

# Tiada saluran air dikesan



Dua petugas JKR menunjukkan kerja baik pulih tanah runtuh di Taman Idaman yang bermula semalam.  
- Foto: BERNAMA



## HULU SELANGOR

- Proses pemetaan yang dibuat Jabatan Pengairan dan Saliran (JPS) di kawasan tanah runtuh di Taman Idaman, Serendah di sini mendapati tiada sebarang saluran pada permukaan tanah.

Pegawai Daerah Hulu Selangor, Mohd Fauzi Mohd Yatim berkata, pemetaan dibuat dengan kaedah *drone video mapping* bertujuan untuk mengenal pasti jika terdapat punca air yang mengalir ke taman perumahan itu.

"Kerja-kerja cerapan telah selesai dilakukan dan pemeriksaan awal JPS mendapati tiada punca air yang menjadi punca aliran air bawah tanah, yang boleh menyebabkan runtuh tanah berlaku," katanya

kepada media di sini, semalam.

Beliau berkata, laporan awal hasil pemetaan itu akan dibentangkan kepada Jabatan Kerja Raya (JKR) bersama laporan Jabatan Mineral dan Geosains dalam masa terdekat dan punca sebenar kejadian tanah runtuh itu akan didedahkan kepada umum.

Katanya, kerja-kerja pengukuhan tebing tanah bagi mengelak berlaku runtuh tanah susulan telah selesai dijalankan sepenuhnya.

Sementara itu, Ketua Polis Daerah Hulu Selangor, Superintendan R Supramaniam berkata, setakat ini tiada lagi pergerakan tanah berlaku.

Kejadian tanah runtuh itu menyebabkan 340 individu daripada 64 keluarga terjejas dan mereka diarahkan untuk mengosongkan kediaman masing-masing. - Bernama